



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA SITA

Kikao cha Kumi na Tano – Tarehe 29 Mei, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. TAARIFA YA SPIKA:

II. HATI ZA KUWASILISHA MEZANI:

Waziri wa Biashara, Viwanda na Masoko:

Hotuba ya Makadirio ya Mapato na Matumizi ya Wizara ya Biashara,
Viwanda na Masoko kwa Mwaka 2017/2018.

Mwenyekiti wa Kamati ya Fedha, Biashara na Kilimo:

Hotuba ya maoni ya Kamati ya Fedha, Biashara na Kilimo kuhusu Hotuba
ya Makadirio ya Mapato na Matumizi ya Wizara ya Biashara, Viwanda na
Masoko kwa Mwaka 2017/2018.

III. MASWALI:

Ofisi ya Rais, Katiba, Sheria, Utumishi wa Umma na Utawala Bora:

98. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Kwa muda mrefu Serikali imekuwa na kigugumizi kuhusu kuifanya siku ya mwaka mpya wa Kiislamu kuwa siku ya mapumziko. Suala hili licha kuwa halina matatizo kwa Waumini wa dini ya Kiislamu ambao ndiyo wengi hapa nchini kwetu, Serikali bado imelikalia na kila linapoulizwa Serikali wamekuwa wanajibu kuwa ni jambo zuri na watalichukuwa na kulifanyia kazi.

- (a) Ni muda gani huo hadi leo hii bado Serikali inalifanyia kazi suala hilo.
- (b) Maadhimisho mengine kama vile Maulid Nabii yanakuwa na siku ya Mapumziko na hakuna tatizo lolote, kwanini Serikali inasita kuufanya mwaka mpya wa Kiislamu kuwa siku ya Mapumziko.
- (c) Lini Serikali itaruhusu mwaka mpya wa Kiislamu kuwa siku ya mapumziko kitaifa.

Wizara ya Kilimo, Maliasili, Mifugo na Uvuvi:

136. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa katika Programu ndogo ya Matrikta na Maendeleo ya huduma ya Kilimo ya 2016/2017 Serikali kupitia Wizara ilipanga kulima jumla ya ekari 33,590 kwa Unguja na Pemba, ambapo pia ilipanga kuzalisha tani 250 za mbegu ya mpunga kwa ajili ya kilimo cha umwagiliaji.

- (a) Je, Wizara imelifikia lengo la kuzalisha tani 250 za mbegu ya mpunga na kama halikufikiwa, Je, ni tani ngapi za mbegu hiyo zilizozalishwa.
- (b) Je, Serikali ina mpango gani wa kuachana na mbegu ya Nerica ambayo inaonekana haina tija kubwa sana kwa Wakulima wetu wa hapa Zanzibar na badala yake kutafuta mbegu mbadala.
- (c) Je, Serikali ilikamilisha mpango wake wa kununua mbolea tani 700 na lita 1500 za dawa za kuulia wadudu na kuwafikishia wakulima kwa wakati uliokusudiwa.

Wizara ya Habari, Utalii, Utamaduni na Michezo:

167. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Habari, Utalii, Utamaduni na Michezo:

Hivi karibuni Zanzibar imefanikiwa kupata uanachama wa Shirikisho la Vyama vya Mpira wa Miguu Afrika (CAF), kutokana na juhudi kubwa zilizofanywa na aliyekuwa Waziri wa Habari, Sanaa na Michezo Mhe. Nape Moses Nnauye kwa kushirikiana na TFF, Uongozi wa Wizara na ZFA ambao kwa pamoja wanastahili pongezi.

- (a) Je, Wizara inayoshughulikia Michezo Zanzibar imechukuwa hatua gani kuwaelimisha wahusika mbali mbali wa Michezo Zanzibar ambao wanapeleka masuala ya michezo mahakamani kinyume na masharti ya uanachama wa CAF ambao mwanachama anaweza kupoteza uanachama endapo masuala ya michezo yataamuliwa mahakamani.
- (b) Hatua gani Serikali itachukua kuwataka wale wote waliopeleka madai yao mahakamani kuyaondoa na kupiga mstari wa kuanza kujenga upya Chama cha Mpira wa Miguu Zanzibar (ZFA) na maendeleo ya mpira Zanzibar.

- (c) Je, baada ya ZFA kuwa mwanachama wa CAF mpango gani umefanyika kubadili sera ya michezo na Sheria zake ili kwenda sambamba na uwakilishi wa soka ya Zanzibar kimataifa, ikiwemo kumaliza migogoro ya michezo nje ya mahakama.

Wizara ya Ardhi, Maji, Nishati na Mazingira:

163. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Ardhi, Maji, Nishati na Mazingira:

Serikali ya Mapinduzi ya Zanzibar inajitahidi sana kuleta maendeleo hasa katika suala la maji, imedhamiria kulimaliza. Lakini pamoja na juhudi zote, bado inaonekana kimaumbile kuna tatizo la uhaba hasa katika vyanzo vya maji vilipo. Mwenyezi Mungu ametuletea mashimo makubwa ya maji ndani ya Mji wa Unguja ambayo tumeyaacha mpaka wananchi wamejenga karibu na mashimo hayo na sasa imekuwa kero, hasara na mafuriko wakati wa mvua kubwa.

- (a) Je, Serikali imefanyia utafiti wa kina juu ya mashimo hayo ya maji na kushindwa kujua yana faida au hasara gani.
- (b) Kama tayari, Je, ni faida gani au hasara gani inayopatikana na kama bado ni lini utafiti huu utafanyika ili kujua hidaya hii tuliropewa na Mwenyezi Mungu.

Wizara ya Afya:

101. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Rais wa Zanzibar na Mwenyekiti wa Baraza la Mapinduzi, Dkt. Ali Mohammed Shein anastahili pongezi kwa jitihada kubwa anazofanya katika maendeleo ya sekta ya afya nchini. Pamoja na hatua hizo kubwa, bado maradhi kama saratani yamekuwa yakiongezeka nchini na wananchi wanyonge hawamudu gharama za matibabu kama vile dawa na mionzi ambayo wanalazimika kufuata huduma hiyo

katika Taasisi ya Saratani ya Ocean Road, jijini Dar es Salaam.

- (a) Je, Serikali imejipanga vipi kuimarisha kliniki ya Saratani ya Mnazi mmoja kwa kuimarisha huduma za matibabu kwa njia ya dawa na mionzi.
- (b) Serikali haioni ulazima wa kutafuta wafadhili wa kujenga miundombinu na vifaa kwa ajili ya matibabu ya saratani ili kuwapunguzia gharama wananchi za kufuata matibabu hayo Dar es Salaam.
- (c) Ni kiasi gani cha fedha kinachohitajika ili huduma ya matibabu ya Saratani iweze kupatikana kwa ukamilifu katika Hospitali ya Mnazi Mmoja.

Wizara ya Ujenzi, Mawasiliano na Usafirishaji:

65. MHESHIMIWA OMAR SEIF ABEID (Jimbo la Konde)
- Atamuuliza Mheshimiwa Waziri wa Ujenzi, Mawasiliano na Usafirishaji:

Makangale ni eneo muhimu la Uwekezaji huko Pemba liliopo katika mpaka wa bahari ya Hindi kati ya nchi yetu na jirani zetu Kenya yaani eneo la Shimoni Mombasa kiasi cha kilomita 45 tu.

- (a) Je, Serikali baada ya kujenga kituo kidogo cha polisi, ina mpango gani wa kujenga Bandari ndogo katika eneo hilo au eneo lililo karibu na Makangale kwa ajili ya kutoa huduma kwa wageni ambao wanaweza kuingia na kutoka nchi jirani.
- (b) Je, Serikali ina mpango gani wa kujenga Uwanja mdogo wa ndege japo wa kutua helikopta kwa ajili ya kurahisisha usafiri wa wageni.
- (c) Ni lini Serikali itaweka Ofisi za Uhamiaji, ZRB pamoja na TRA katika eneo hilo.

156. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Ujenzi, Mawasiliano na Usafirishaji:

Serikali ya Mapinduzi ya Zanzibar imejitahidi katika kuitangaza Zanzibar Kiutalii na kwa kiasi kikubwa imefanikiwa. Katika sehemu moja inayogusa Utalii ni Uwanja wa Ndege unaotumiwa na wageni wetu, ambapo Serikali imejipanga kujenga Uwanja wa Ndege mpya. Hata hivyo, Uwanja huo mpya bado haujaanza kutumika hivyo bado Uwanja wetu mkongwe unahitajika kwa hivi sasa ili kukidhi haja ya wageni wetu.

- (a) Je, Serikali ina mpango gani wa haraka kulifanyia matengenezo jengo la Uwanja wa Ndege huo.
- (b) Je, Serikali haioni kuwa kuna haja ya haraka kuufanyia matengenezo Uwanja huo hasa eneo la kusafiria na kuondokea abiria.
- (c) Je, Serikali haioni kuwa kulifumbia macho suala hili ni kupoteza wageni na mapato yetu.

IV. HOJA ZA SERIKALI

Wizara ya Kilimo, Maliasili, Mifugo na Uvuvi:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Kilimo, Maliasili, Mifugo na Uvuvi kwa Mwaka 2017/2018.

Waziri wa Biashara, Viwanda na Masoko:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Biashara, Viwanda na Masoko kwa Mwaka 2017/2018.

Zanzibar,
29 Mei, 2017.

(Raya Issa Msellem)
KATIBU WA BARAZA.